



Republika e Kosovës
Republika Kosova-Republic of Kosovo
Kuvendi - Skupština - Assembly

Ligji Nr. 03/L-050

PËR THEMELIMIN E KËSHILLIT TË SIGURISË SË KOSOVËS

Kuvendi i Republikës së Kosovës,

Në bazë të nenit 65(1) të Kushtetutës së Republikës së Kosovës;

Miraton këtë

LIGJ PËR THEMELIMIN E KËSHILLIT TË SIGURISË SË KOSOVËS

KREU I
GJENDJA E ZAKONSHME

Neni 1
Misioni

1.1 Këshilli i Sigurisë së Kosovës ka rol këshillues në të gjitha çështjet që lidhen me sigurinë e Kosovës dhe kontributin e tij për stabilitetin rajonal.

1.2 Këshilli i Sigurisë së Kosovës rekomandon politika dhe strategji për sigurinë .

1.3 Këshilli i Sigurisë së Kosovës duhet të ofroj informata dhe vlerësime të gjendjes së sigurisë në Kosovë, që t'i mundësojnë Qeverisë së Republikës së Kosovës marrjen e vendimeve përkatëse lidhur me çështjet e sigurisë.

Neni 2

Kompetencat

2.1 Këshilli i Sigurisë së Kosovës, në koordinim me Presidentin e Republikës së Kosovës, përgatitë dhe shqyrton Strategjinë e Sigurisë së Kosovës. Strategjia e Sigurisë së Kosovës miratohet nga Qeveria dhe i dorëzohet Kuvendit të Kosovës për miratim përfundimtar.

2.2 Këshilli i Sigurisë së Kosovës ofron komente me shkrim për të gjitha projektligjet që kanë të bëjnë me sektorin e sigurisë dhe institucionet e tij. Këshillat dhe komentet e Këshillit të Sigurisë së Kosovës merren parasysh nga Qeveria e Republikës së Kosovës para miratimit të projektligjit nga ana e Qeverisë dhe dorëzimit të tij Kuvendit të Republikës së Kosovës për miratim përfundimtar.

2.3 Këshilli i Sigurisë së Kosovës shqyrton planin qeverisës dhjetëvjeçar për Forcën e Sigurisë së Kosovës para se ai të miratohet nga Qeveria dhe pastaj t'i dorëzohet Kuvendit të Kosovës për miratim përfundimtar.

2.4 Këshilli i Sigurisë së Kosovës shqyrton platformën vjetore të inteligjencës dhe prioritetet strategjike për Agjencinë e Inteligjencës së Kosovës para se ajo të miratohet nga Qeveria e Kosovës.

2.5 Këshilli i Sigurisë së Kosovës rishikon politikat dhe planet strategjike të paraqitura nga Ministri i Punëve të Brendshme që kanë të bëjnë me Policinë e Kosovës para miratimit nga Qeveria e Republikës së Kosovës.

2.6 Këshilli i Sigurisë së Kosovës shqyrton politikat dhe planet strategjike të paraqitura nga Ministri i Punëve të Brendshme që kanë të bëjnë me Shërbimin e Doganave para miratimit nga Qeveria e Kosovës.

2.7 Këshilli i Sigurisë së Kosovës shqyrton politikën për siguri të jashtme, draftet e të gjitha traktateve dhe marrëveshjeve ndërkombëtare që janë të rëndësishme për sigurinë dhe vendosjen e marrëdhënieve në mes të agjencive kombëtare për siguri dhe agjencive, apo organizatave homologe ndërkombëtare.

2.8 Këshilli i Sigurisë së Kosovës këshillon Presidentin dhe Qeverinë e Republikës së Kosovës mbi propozimin për përfshirjen e propozuar të institucioneve dhe agjencive të sigurisë së Kosovës në operacione jashtë territorit të Republikës së Kosovës. Institucionet dhe agjencitë qeveritare të sigurisë në Kosovë kanë të drejtë të shërbejnë jashtë vetëm në bazë të marrëveshjes me vendin pranues ose në bazë të ftesës së organizatës ndërkombëtare në të cilën Kosova është anëtare apo aspiron të anëtarësohet, ose në bazë të një Rezolutive të Këshillit të Sigurimit të Kombeve të Bashkuara. Kuvendi i Republikës së Kosovës duhet të japë pëlqimin paraprak për dërgimin e personelit në operacione jashtë vendit.

2.9 Presidenti i Republikës së Kosovës ka të drejtë të kërkojë këshilla nga Këshilli i Sigurisë së Kosovës. Këshilli i Sigurisë së Kosovës me kohë do t'i përgatisë dhe japë këshillën e kërkuar Presidentit të Republikës së Kosovës.

Neni 3

Përbërja

3.1 Këshilli i Sigurisë së Kosovës përbëhet prej anëtarëve të mëposhtëm në cilësinë e anëtarëve të përhershëm me autoritet ekzekutiv:

- a) Kryeministri;
- b) Zëvendës Kryeministri(at);
- c) Ministri për Forcën e Sigurisë së Kosovës, ose në mungesë të tij apo saj, Zëvendës Ministri(at);
- d) Ministri i Punëve të Jashtme, ose në mungesë të tij apo saj Zëvendës Ministri;
- e) Ministri i Punëve të Brendshme, ose në mungesë të tij apo saj Zëvendës Ministri;
- f) Ministri i Drejtësisë, ose në mungesë të tij apo saj Zëvendës Ministri;
- g) Ministri i Ekonomisë dhe Financave, ose në mungesë të tij apo saj Zëvendës Ministri;
- h) Ministri për Kthim dhe Komunitete, ose në mungesë të tij apo saj Zëvendës Ministri.

3.2 Nëse asnjëri nga anëtarët e përhershëm të Këshillit të Sigurisë së Kosovës me autoritet ekzekutiv nuk i takon komunitetit serb, Kryeministri emëron një anëtar shtesë nga radhët e ministrave serbë si anëtar shtesë i Këshillit të Sigurisë së Kosovës me autoritet ekzekutiv.

3.3 Anëtarë tjerë jo të përhershëm ekzekutiv ministror mund të emërohen nga Kryesuesi i Këshillit të Sigurisë së Kosovës me status të përkohshëm.

3.4 Këshilli i Sigurisë së Kosovës, si anëtar të përhershëm po ashtu përfshin anëtarët e mëposhtëm në rolin këshillëdhënës:

- a) një përfaqësues i Presidentit të Republikës së Kosovës;
- b) drejtorin e Agjencisë së Kosovës për Inteligjencë;
- c) këshilltarin e lartë të Kryeministrit;
- d) këshilltarin e Kryeministrit për Siguri,
- e) drejtorin e Përgjithshëm të Policisë së Kosovës;
- f) komandantin e Forcës së Sigurisë të Kosovës;
- g) sekretarin e Këshillit të Sigurisë së Kosovës;
- h) drejtorin e Departamentit për Menaxhimin e Emergjencave në Ministrinë e Punëve të Brendshme;
- i) drejtori i Doganave të Republikës së Kosovës

3.5 Anëtarë shtesë në cilësinë e këshilltarëve me status të përkohshëm mund të emërohen nga Kryesuesi i Këshillit të Sigurisë së Kosovës sipas nevojës.

3.6. Në cilësinë e vëzhguesit mund të marrin pjesë Kryetari i Komisionit parlamentar për siguri dhe kryetari i komisionit parlamentar për të drejtat dhe interesat e komuniteteve.

Neni 4

Kryesimi i takimeve

4.1 Këshilli i Sigurisë së Kosovës punon nën përgjegjësinë e Kryeministrit, i cili kryeson takimet e tij.

4.2 Kryeministri në pamundësi të kryesimit të takimit, këtë autoritet mund ta delegojë tek njëri nga Zëvendës Kryeministrat, ose në mungesë të tyre një anëtar tjetër të Këshillit të Sigurisë së Kosovës sipas rendit të prioritetit.

Neni 5

Thirrja e takimeve të Këshillit të Sigurisë së Kosovës

5.1 Këshilli i Sigurisë së Kosovës harton planin vjetor dhe cakton të mbajë jo më pak se një takim çdo tre muaj.

5.2 Prioritetet për planin vjetor përcaktohen nga Këshilli i Sigurisë së Kosovës.

5.3 Takimet e Këshillit të Sigurisë së Kosovës thirren formalisht nga Kryeministri.

5.4 Kryeministri është i obliguar të thërras takimin e Këshillit të Sigurisë së Kosovës në rast se Presidenti i Republikës së Kosovës apo shumica e anëtarëve të përhershëm të Këshillit të Sigurisë së Kosovës formalisht kërkojnë takim. Takimet mbahen pas njoftimit paraprak, siç është e përcaktuar me rregulloret në fuqi.

Neni 6

Rendi i ditës për takime

Rendi i ditës për takimet e Këshillit të Sigurisë së Kosovës do të caktohet nga Kryesuesi i Këshillit.

Neni 7

Vendimmarrja

Procesi i vendimmarrjes do të rregullohet me Rregullore të brendshme të Këshillit të Sigurisë së Kosovës.

Neni 8

Raportimi i Këshillit të Sigurisë së Kosovës

Kryesuesi është përgjegjës për të raportuar për shqyrtimet dhe/ose rekomandimet e Këshillit të Sigurisë së Kosovës para Qeverisë.

Neni 9

Mbikëqyrja parlamentare e Këshillit të Sigurisë së Kosovës

9.1 Kryesuesi dorëzon Raportin Vjetor të Aktiviteteve për diskutim dhe miratim nga komisioni përkatës i Kuvendit, jo më vonë se muaji mars për vitin e kaluar. Komisioni

mund të kërkojë raporte rreth aktiviteteve specifike të Këshillit të Sigurisë së Kosovës kurdo që konstatohet e nevojshme.

9.2 Komisioni përkatës i Kuvendit të Republikës së Kosovës mund të organizojë seanca për çështje lidhur me punën e Këshillit të Sigurisë së Kosovës të cilat Kuvendi dëshiron t'i parashtrojë.

Neni 10

Obligimi për konfidencialitet i anëtarëve të organit parlamentar për mbikëqyrje

10.1 Anëtarët e komisionit mbikëqyrës parlamentar janë të obliguar të mbajnë konfidenciale informatat e marra në çfarëdo forme nga Këshilli i Sigurisë së Kosovës, apo nga përfaqësuesit e saj të autorizuar, të cilat konsiderohen konfidenciale në pajtim me legjislacionin në fuqi. Obligimi për konfidencialitet mbetet në fuqi edhe pas përfundimit të anëtarësisë së tyre në komisionin parlamentar për mbikëqyrje. Çfarëdo shkelje e obligimit për sekret mund të dënohet deri në shkallën më të lartë që parasheh ligji.

10.2 Komisioni mbikëqyrës parlamentar do të përpilojë procedura të shkruara, në pajtim me ligjet e aplikueshme, për të mbrojtur zbulimin e paautorizuar e të gjitha informatave të klasifikuara të cilat i ofrohen komisionit mbikëqyrës parlamentar, apo anëtarëve të tij individualë, nga ana e Këshillit të Sigurisë së Kosovës apo përfaqësuesit e tij të autorizuar.

Neni 11

Publikimi i vendimeve të Këshillit të Sigurisë së Kosovës

11.1 Çështjet e diskutuara nga Këshilli i Sigurisë së Kosovës klasifikohen në pajtim me ligjin e aplikueshëm.

11.2 Të gjitha vendimet të cilat sipas ligjit të aplikueshëm nuk konsiderohen konfidenciale publikohen dhe vihen në dispozicion të publikut.

11.3 Të gjithë anëtarët dhe ish anëtarët e Këshillit të Sigurisë së Kosovës, përfshirë anëtarët e Sekretariatit dhe Qendrës për Komunikim, bartin përgjegjësi individuale ligjore për zbulimin dhe mos-zbulimin e informatave, në pajtim me ligjin e aplikueshëm.

KREU II

GJENDJA E JASHTËZAKONSHME

Neni 12

Misionet

Gjatë gjendjes së jashtëzakonshme, Këshilli i Sigurisë së Kosovës ushtron autoritet dhe përgjegjësi ekzekutive në emër të Qeverisë dhe sikurse është përcaktuar në nenin 13 të

këtij ligji, të kufizuar në kohë dhe në ato veprime të cilat konsiderohen të nevojshme për të tejkaluar atë situatë emergjente.

Neni 13

Autoriteti ekzekutiv gjatë gjendjes së jashtëzakonshme

13.1 Këshillit të Sigurisë së Kosovës i besohet autoriteti ekzekutiv pas shpalljes së gjendjes së jashtëzakonshme nga Presidenti i Republikës së Kosovës, në pajtim me Kushtetutën dhe ligjin në fuqi.

13.2 Autoriteti i Këshillit të Sigurisë së Kosovës gjatë gjendjes emergjente do të kufizohet në veprime, të cilat në pajtim me ligjet në fuqi janë të domosdoshme për t'u ballafaquar me gjendjen e emergjencës.

13.3 Këshilli i Sigurisë së Kosovës mund t'i delegojë autoritetin organeve të ndryshme për t'u ballafaquar me situata të caktuara gjatë gjendjes së jashtëzakonshme, siç është përcaktuar me ligjet në fuqi.

13.4 Këshilli i Sigurisë së Kosovës informon Kuvendin e Kosovës për veprimet e tij, në pajtim me ligjet në fuqi.

Neni 14

Mbledhjet e Këshillit të Sigurisë së Kosovës gjatë gjendjes së jashtëzakonshme

14.1 Gjatë gjendjes së jashtëzakonshme të shpallur, Presidenti i Republikës së Kosovës kryeson Këshillin e Sigurisë së Kosovës.

14.2 Nëse Presidenti i Republikës së Kosovës nuk ka mundësi të thirr mbledhjen, mbledhjet e Këshillit të Sigurisë së Kosovës mund të thirren në çfarëdo kohe gjatë gjendjes së jashtëzakonshme me anë të një kërkesë të veçantë nga Qeveria ose Kuvendi i Kosovës me shumicën e votave të deputetëve të pranishëm.

Neni 15

Përbërja

15.1 Gjatë kohës së gjendjes së shpallur të emergjencës, Këshilli i Sigurisë së Kosovës përbëhet nga Presidenti i Republikës, Kryeministri dhe Ministrat e Qeverisë, në të cilët duhet të bartet pushteti ekzekutiv. Nëse ndonjëri nga ministrat nuk është në gjendje të marrë pjesë, në mungesë të tij duhet t'i lejohet pjesëmarrja zëvendës ministrit.

15.2 Këshilli i Sigurisë së Kosovës do të përfshijë këta anëtarë në cilësi këshillëdhënëse:

- a) drejtorin e Agjencisë së Kosovës për Siguri;
- b) këshilltarin e lartë për siguri të Presidentit;
- c) këshilltarin e Kryeministrit për Siguri,
- d) drejtorin e Përgjithshëm të Policisë së Kosovës;
- e) komandantin e Forcës së Sigurisë së Kosovës;
- f) sekretarin e Këshillit të Sigurisë së Kosovës;

g) drejtorin e departamentit për menaxhimin e emergjencave të Ministrisë së Punëve të Brendshme.

KREU III

Organet mbështetëse

Neni 16

Roli i Sekretariatit

16.1 Këshilli i Sigurisë së Kosovës ka Sekretariatit e tij i cili rregullohet me legjislacion sekondar.

16.2 Sekretariati do të udhëhiqet nga Sekretari i Këshillit të Sigurisë së Kosovës, i cili emërohet nga Komisioni për Emërime të Larta Publike, në pajtim me ligjin në fuqi.

16.3 Sekretari i Këshillit të Sigurisë së Kosovës i raporton drejtpërdrejtë Kryesuesit.

16.4 Sekretariati i Këshillit të Sigurisë së Kosovës është përgjegjës për:

- a) përgatitjen e raporteve periodike dhe analizave për Qeverinë e Republikës së Kosovës dhe Këshillin e Sigurisë së Kosovës që kanë të bëjnë me çështjet politike të sigurisë;
- b) koordinimin e hartimit të strategjisë dhe politikave të sigurisë në Kosovë, përfshirë edhe ndërtimin e kapaciteteve, instrumentet e politikave dhe hulumtimit; dhe
- c) ofrimin e mbështetjes administrative dhe funksionale Këshillit të Sigurisë së Kosovës.

Neni 17

Qendra e Situatave

17.1 Këshilli i Sigurisë së Kosovës mbështetet nga një Qendër e Situatave e cila i ofron informata të shpejta rreth gjendjes dhe koordinon aktivitetet operacionale në tërë Kosovën. Shërben si qendër operacionale për mbledhjen e informatave, analizave themelore dhe mbështetjes për menaxhim të krizave.

17.2 Të gjitha ministritë relevante, institucionet e sigurisë dhe agjencitë i ofrojnë informata Qendrës e Situatave.

17.3 Qendra e Situatave po ashtu mbështetet nga përfaqësuesit e Forcës së Sigurisë së Kosovës, Policisë së Kosovës, dhe Agjencisë së Kosovës për Inteligjencë e cila është përgjegjëse për ndërlidhje me agjencitë e tyre përkatëse.

Neni 18

Komisionet Koordinuese

18.1 Kryeministri themelon Komisionin për Inteligjencë. Komisioni për Inteligjencë përbëhet nga Sekretari i Këshillit të Sigurisë së Kosovës dhe përfaqësuesit e lartë të Policisë së Kosovës, Agjencisë së Kosovës për Inteligjencë, Forcës së Sigurisë së Kosovës, Shërbimit Doganor, dhe çfarëdo agjencie apo organizate e autorizuar sipas ligjit ka mandat për kryerjen e aktiviteteve të inteligjencës. Komisioni i raporton Këshillit të Sigurisë së Kosovës dhe kryesohet nga Kryeministri apo personi i caktuar nga ai/ajo.

18.2 Komisioni koordinon aktivitetet e inteligjencës të organizatave dhe agjencive të përcaktuara në paragrafin 1 të këtij neni për qëllim të:

- a) sigurimit që politikat e qeverisë në sektorin e inteligjencës janë duke u zbatuar sipas prioriteteve të përcaktuara;
- b) sigurimit të bashkëpunimit efikas në mes të agjencive dhe këmbimi i informacionit:

18.3 Këshilli i Sigurisë së Kosovës mund të themelojë edhe komisione sipas nevojës, të cilat i raportojnë Këshillit të Sigurisë së Kosovës.

KREU IV

DISPOZITAT PËRFUNDIMTARE DHE KALIMTARE

Neni 19

Kualifikimet për punësim në Qendrën e Situatave dhe Sekretariatit të Këshillit të Sigurisë së Kosovës

Përveç kërkesave të zakonshme për punësim në Shërbimin Civil të Kosovës, punëtorët e Qendrës së Situatave ose Sekretariatit të Këshillit të Sigurisë së Kosovës duhet të posedojnë edhe leje përkatëse për siguri, të përcaktuara me ligjin në fuqi.

Neni 20

Dispozitat kalimtare

20.1 Këshilli i Sigurisë së Kosovës ushtron funksionet e tij pa paragjykime ndaj mandateve specifike të organizatave ndërkombëtare sikurse është përcaktuar me anë të zgjidhjes së statusit dhe Kushtetutës.

20.2 Deri në miratimin e procedurës për dhënie e lejeve përkatëse për siguri të përmendura në nenin 19 të këtij ligji, punëtorëve të Qendrës së Situatave dhe Sekretariatit të Këshillit të Sigurisë së Kosovës mund t'u lëshohen leje të përkohshme për siguri, të cilat vlejnë për 6 muaj, në rast se ata punëtor i kanë dorëzuar të plotësuar pyetësorët për leje të sigurisë. Lejet e përkohshme për siguri mund të zgjaten një herë për një periudhë e cila nuk kalon gjashtë muaj të tjerë.

20.3 Paragrafi 2 i këtij neni vlen vetëm për individët e punësuar në Qendrën e Situatave apo në Sekretariatën e Këshillit të Sigurisë së Kosovës para zbatimit të procedurës për dhënien e lejeve për siguri.

Neni 21
Dispozitat përfundimtare

Buxheti i Këshillit të Sigurisë së Kosovës paraqitet nga ana e Sekretarit të Këshillit të Sigurisë së Kosovës dhe miratohet nga Kuvendi i Kosovës, në pajtim me ligjin në fuqi.

Neni 22
Hyrja në fuqi

Ky ligj hyn në fuqi pas miratimit në Kuvendin e Republikës së Kosovës dhe shpalljes së tij në Gazetën Zyrtare të Kosovës.

Ligji Nr. 03/L-050
13 mars 2008

Kryetari i Kuvendit të Republikës së Kosovës,

Jakup KRASNIQI